

LEWIS, Syr WILLIAM THOMAS (1837 - 1914), yr ARGLWYDD MERTHYR o SENGHENYDD 1af, perchennog glofeydd

Enw: William Thomas Lewis
Dyddiad geni: 1837
Dyddiad marw: 1914
Priod: Anne Lewis (née Rees)
Plentyn: Katherine Mary Green (née Lewis)
Rhiant: Thomas William Lewis
Rhyw: Gwryw
Galwedigaeth: perchennog glofeydd
Maes gweithgaredd: Diwydiant a Busnes
Awdur: Robert Thomas Jenkins

Ganwyd 5 Awst 1837 yn fab i Thomas William Lewis, peiriannydd gwaith haearn Plymouth (Merthyr Tydfil). Bu yn ysgol **Taliesin Williams** ('ab lolo'), ond yn 13 oed prentisiwyd ef gyda'i dad.

Yn 1855 aeth i wasanaeth stad **ardalydd Bute**, yn beiriannydd cynorthwyol, ac yn 1864 penodwyd ef yn ofalwr ar holl fwyngloddiau'r stad. Yn yr un flwyddyn priododd Anne, ferch WILLIAM REES, perchennog glofa Llety-Shenkin, Aberdâr (bu hi farw yn 1902).

Taid iddi hi, ROBERT THOMAS (dyn o orllewin Cymru), a gymrodd brydles ar y Waun Wylt (Abercanaid) yn 1824, ac a agorodd yn 1828, y lefel gyntaf i farchnata glo at ddibenion tai annedd (gynt, at doddi haearn yn unig y cynhyrchid glo ar raddfa fawr). Yr oedd wedi cysylltu ei fusnes â Llundain erbyn 1830. Bu farw 19 Chwefror 1833, a dilynwyd ef yn hyn gan ei weddw LUCY THOMAS ('mam y fasnach lo Gymreig,' 1781 hyd 27 Medi 1847), ac yn ddiweddarach, hyhi a'i mab WILLIAM THOMAS a ddechreuodd y fasnach mewn glo 'ager' rhwng Cymru a Llundain. Agorodd William Thomas lofa Llety-Shenkin yn 1843, a gweithiwyd hi wedyn gan ei frawd-yng-nghyfraith William Rees.

Bellach, nid yn unig yr oedd W. T. Lewis yn rheoli pyllau'r Bute yn Nhrefherbert, ond daeth yn anturwr ar ei gyfrif ei hunan; rhwng 1870 a 1880 cafodd i'w ddwylo y pyllau yn rhan isaf Cwm Rhondda a adwaenid wedyn fel 'Lewis Merthyr'; chwiliodd am wythiennau glo yng Nghwm Rhymini; ac agorodd bwll 'Senghenydd' yn 1895. Yn 1880 rhoddwyd arno ofal holl fuddiannau'r Bute yn y Deheudir, a helaethodd yntau'r dociau yng Nghaerdydd yn ddirfawr wedi hynny. Tyfodd yn allu mawr iawn yn y fasnach lo a'r diwydiannau eraill a oedd ynglyn â hi. Yr oedd yn 1864-5 wedi ffurfio cynghrair o berchnogion glofeydd cwm Aberdâr, a datblygodd hwnnw erbyn 1872 yn 'South Wales and Monmouthshire Coalowners Association,' yn ymateb i gynnydd yr undebau llafur a'r streiciau mynych. Hawliai ef ei hunan mai efe a ddyfeisiodd ddull adnabyddus y 'raddfa symudol' ('sliding scale') at bennu cyflogau, ond priodolir hynny i wyr eraill hefyd, megis **H. Hussey Vivian**, **arglwydd Abertawe** - gweler Elizabeth Phillips, *Pioneers of the Welsh Coalfield*, 256-61.

O gymryd ei egwyddorion yn ganiataol, gellid maentumio bod Lewis yn wr dyngarol; ac er iddo gael ei ystyried yn ddyn caled, gelwid arno'n fynych i gyfryngu mewn ymrafaelion diwydiannol. Bu'n aelod o gryn nifer o ddirprwyaethau brenhinol ar bynciau'n dwyn perthynas â phyllau glo; gwnaeth ei ran hefyd yn llywodraeth leol ei sir a threfi Merthyr Tydfil ac Aberdâr. Urddwyd ef yn farchog yn 1885 ac yn farwnig yn 1896, a chodwyd ef i Dyr Arglwyddi yn 1911.

Cafodd ddau fab a chwech o ferched - un ohonynt oedd priod **C. A. H. Green**, archesgob Cymru wedyn. Bu farw 27 Awst 1914.

Awdur

Yr Athro Emeritus Robert Thomas Jenkins, (1881 - 1969)

Ffynonellau

Who was who?

Elizabeth Phillips, op. cit., yn enwedig pen. xxv

Darllen Pellach

ODNB: *Thomas, Lucy* (bap. 1781, d. 1847)

J. Austin Jenkins, W. T. Pike (ed.), *South Wales and Monmouthshire at the opening of the twentieth century: Contemporary biographies*(Brighton 1907), t.200

Erthygl Wicipedia: *William Lewis, Barwn 1af Merthyr*

Erthygl Wicipedia: *Lucy Thomas*

Dolenni Ychwanegol

Wikidata: Q8014533

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/>



Jenkins, R. T., (1953). LEWIS, Syr WILLIAM THOMAS (1837 - 1914), yr ARGLWYDD MERTHYR o SENGHENYDD 1af, perchennog glofeydd. *Y Bywgraffiadur Cymreig*. Adferwyd 20 Tac 2024, o <https://bywgraffiadur.cymru/article/c-LEWI-THO-1837>

Bywgraffiadur

Preifatrwydd a Chwci
Hawffraint
Y Prosiect
Cymorth
Cysylltu

LGC
NLW

LLYFRGEL
THE NATION



Yn ddiwedd
Llywodraeth Cymru
Supported by
Welsh Government